

Buna sira! Buna sira, me cari siuri! E ben, c' me c' la vâ?

A suma turna chî a dei in gir per la 55^a vota a sta Divota Cumedìa.

Eh! la me cara gent, a l'è in brüt afari avnì vêg, u temp el vula. Quondi ch'iera in fanciot, am ricord, che el vaconsi ad Nadal i rivavu mai, ades am ricord monc pü sa j'ò facc el Feragust; um smeia d'esi semper acsi chi'n suma cun i me giabot e i me plison. I plison, per la verità, i son turna avnì ad moda, e nent ammac an t'el festi d'Nadal.

Per la verità ist'ani aurivu c' mensè diversament, fè in afari pü mudern, aurivu dî, cme chi fon ades an ti cinema e an t'la television, i nom du Regista, del vice regista, del vice del vice, el pruchè, el meisdabosch, u sartù, el barista ch'el porta el caffè e la gasèss, chi cu dà la luce, che chisà perchè us ciama mai ENEL, ma per ogni film, per ogni telegiurnal, l'hà in nom divers: Nani, Rosini, Campagnola.

A l'è giust che tücc j'abu u so mument ad gloria, però s'anduma avonti acsei, anche quondi chi fon na cà nova, oltre au nom d'l'impresari, del prugetista, i devu bitè anche i nom di miradur, del piastrelista, ad chî ch'el porta la sabia; quondi t'vai a la stasion a piè in trenu, i duvreisu dî: treno in partenza sul binario 8, addetto alle partenze "Luigi Cipolla", 1° macchinista, 2° macchinista, controllore, frenatore, acsei jën el viagia pü tranquil, u sà an che mon ca l'è.

A pruposit ad spettacul, ist'ani u j'è el boom du televisur, ogni stonsia uj na j'è jën. J'omi quondi chi venu a cà a la sira i ciamu subit "Se cu j'è ad bon sta sira?", e la muiè anveci ad rispondi "La titeina, u ris an tel brô" la dis: "An sel prim canal: Andreotti, an su sgond le sorelle Bandiera, Montecarlo el fà in film ad Cow-Boy, Teleradiocity a l'è mei vigla quondi che el masnà i son a drumì".

Mai 'na vota c'us seja d'acordi ad vighi tücc el medesim prugrama! El pari el vô la pulitica, la mari el film da pionsi, i fiò i films western, magari quondi cu j'è la reclam, i telefonu a na radio libera per dedichè l'ultima canson ad Battisti o ad Celentano a la so Ciccìolina. Us po' monc pü lesi u giurnal an tel gabinèt, anche lei j'on anfilà u televisuren cun el salvièti ansüma. El bel chi disu che an t'el 1982 per ogni televisur an bionc e neier, ui na sarrà 3 a culur. Meno male! mei ca son semper an po' pesimista, a pensava che fra 3 ani, j'italion ad culurà j'eisu ammac pû el ciapi an tel braji.

Ai me temp j'avu dabon el ciapi an tel braji, j'on anche adèss; però i son nent ciapi, a l'è l'etichèta, la firma ad cui ch'ij fon. L'amporta gnen-te se cül t'at büti andos a l'è bel o brüt, l'amporta cu seja firmà. Acsei el doni quond chi sortu da cà per andè a crumpè (ades us dis "fè u shop-ping") i smeju trücaji cme Niki Lauda e la partensa d'la formula Uno. J'on el scarpi targai Clark, el fular firmà da Pucci, e la bursèta d'la Camerino; pensè che ai me temp j'eru ad cani!

Anche j'omi i son meja da menu; anche cui d'na certa età i voru seguì la moda giovane! Camisi culuraji, majèti cun la früta ansuma; però u j'è na groina, us pô nent bitè la canottiera: e na camisa sutila, trasparent, che suta us vigh la canottiera: la stà mà, e senza canottiera, a na certa età, ui basta in culp d'aria per armani beja anciudà dai rumatic. Chissà perchè im venu nent ancontra: us po' nent fè na majèta fudraja cun la cintura Gibaud? Opura in Kimono da spiaggia, cun andrenta la ventriera contra la colite? Parluma nent di Blu-Gins: jèn a l'entra an t'in negosi, e senza monc di na parola, t'at trovi andrenta in stansien, 20 cm. per 30, cun 3 o 4 dis braji an s'el bras, trai antera la giaca, la camisa, t'scionchi cun i dence el strengghi del scarpi, che chissà perchè an t'is ucasion i sa sligu mai, e finalment t'anfili is para ad blu-gins, che anveci ad stofa i smeju faci cun u ciment armà. Dop 10 minut tironda da chì e da là finalment t'veni fora cun la cerniera a metà; la cumesa ut vigh e senza di na parola ut dà in culp sèc, quasi da Karatè, ut t'la tira sù fina ansuma; jèn u sent in dulur al fidich, c'me chi t'eisu facc l'uperasion d'la cistifellea. Cuc dèn el ven fina fora an mudondi a ciamè se la cerniera us porta an sla dricia o an sla sinistra.

Senza canottiera, senza ventriera, t'vai a finì che t'at ciapi in asident et devi ciamè u dutur. Ciamè u dutur, na parola. Na vota, quondi ch'jandavu an biciclèta j'avnivu, adès cun tut u travaj ch'jon i poru propri pù; acsei u j'è avni ad moda la visita per telefono: "Pronto, andò cus sent mal?" "Acsi chì", "Acsi chi andonda? A dricia o a snistra?" "Eh! Mah! Avsen a l'ambulen". "A l'è la milsa o el fidich?" "E chi cul sà?!". Chissà perchè a scola ch'iamparu tant robi, Garibaldi, Dante Alighieri, i son nent bon a mustrei c'me c'us fà a spiegghè au dutur, per telefono, s'jon el morbillo, u rusasu, o l'anfargiù. Acsei t'finisi semper ad piè du aspirini, antont isi i fon nent mà.

A suma d'ventà tücc "Amici degli animali". Quasi tücc an cà j'on in con, in gat, lo scoiattolo; quondi ch el piov i bütu l'impermeabil al con, il portu dal veterinari a fei scürsè e slungghè la coua; chi c'la propi meja ad bestii an cà, u trà an s'el balcon, an s'la strà, an si cup d'avsen, da mangè ai pivion! Na vota ij ciamavu "Piccioni Viaggiatori", ades cun tut is ben di Diu chi trovu, chi el'è ch'el viagia pü? Chi cui la fa fè ad fè di kilometri per mangè; at che piccioni viaggiatori, i son dventà tücc "Piccioni da bombardament!".

Er bestii, la natura, a suma tücc per l'ecologia, per el verde, el verde oltre che del pionti, anche el verd del purtafoi. J'òn capì che cun cul chi spendu an t'na smoina d'albergo, t'pori fè la "Vacanza Lunga" a sut na tenda o an t'ina roulotte.

Us taca a mag e fra ferii, pont, cassa malattie, cūri acqui termali, us pò rivè fina a la fen ad Setember. El campeggio a l'è diventà in condominio a l'aria aperta; el roui d'la roulotte i servu ammac per el viaggi d'andata, poi t'pori smuntei e vendii. L'impurtont, per is tipu ad vaconsi, l'è truvé in para ad nonu dna vota, cui ch'jandavu an pension a 60 ani, isi j'òn ancora voia ad uardè el masnà, ad fè da mangè, antont i giuvu i von an spiaggia a piè an po' ad su. "I travaiu tut l'ani, gram fanciot!". I nonu d'ades, anveci, cui chi von an pensìon a 40/45 ani, con 50 ani ad marchèti, us vigh chi bitavu sà el marchèti da quondi chi piavu u lacc da la mama; isi j'on voia lur d'andè a piè u su, ad pasè cuca sira cun el ballo liscio; isi a là batüda d'la baby-sitter i ston nent.

Finalment dop ani ad lota e ad cuntestasiòn an t'la scola u j'è stacc la rivolusion del pageli; finalment j'on gavà cui brüt numer, 4, 3 e mèss, dal 4 al 5, con il Giudisio! A l'è la medesima roba, ma jën la tüt in'atra sudisfasion. Per esempi la fieteina cus fava ciapè ancantunaja cun in pivel, i janfilavu 7 ad cunduta e la duviva avnì cumpagnaia dai genitur; ades anveci i don el giudisio: "Matura fisicamente, sembra già orientata verso attività pratiche".

Sing an cunduta el vo pü di mes delinquent, ma "Assai vivace". Jën cu gioga al carteini "Assorto in pensieri extrascolastici". Per jën cl'è na süca "Carente nella preparazione di base". A j'ò senti du doni chi cumentavu el pageli di sò fiò: "A l'è an po' discontinuo, ma per furtèina a l'è abastonsa negligente!".

Finalment anche chì a Lisondria a juma facc in sout ad qualità, anche noi propri cme an tel gran sità, a juma el vigillesse! U smeja nént, ma cun l'età a suma diventà an po' di garüf; sentis ciüflè drera da na bela signorina, anche se pò ut fa la müta, t'at senti subit pü galarì. E sl'è per ciüflè i son an gomba dabon, j'on in fià d'asident! I primi temp cuc dën u diva: "I son nent doni, i son scuséis chi portu la gonna chi son avnì chi an istrusion! A vighiti nent ch'j'on i barbis?". Mei a j'ò uardà, propi cun an po' ad malisia, ma gavà 1 o 2 cun i barbis uj na j'è meia, onsi quondi chi sortu con ra so divisa nova-i smeiu tuti di bun-bon.

A juma perdì u sindich Borgoglio, um dispias, anche s'lera in sicialista al sentivu jën di noster: el purtava la barba cme i frà; lu u l'è rusa però. A la facc cariera! A l'è d'ventà Onorevole! Ai fuma propi toncc auguri; speruma che oltre che an fla Camera u riva fin an t'el Gabinetto. Anche chi ai frà u j'è stacc agli elesion, al t'el meis d'Agust; j'on propi

anversà el caudròn, a juma in Pruvincial nov, Padre Emiliano, na testa feina, jën cl'a studià. Noi al salütuma con tüt el cor, a suma sicur che c'me tücc i so predecessur, u supurtarrà tüti el noster asnadì, cun tonta pasiensa e cumprension.

Ades a piont lei, se no i disi: "Le pü long du Telegiornale". Av presént la me famija...

